

Danschkee, Frau Schwarzer

Hend'r des letscht Woch en dr Zeidong gläsa? Do hot en Rentner en Würzburg (Wezzburrch) en seim Garda Abfall vrbrennt. No isch d' Bolizei komma ond hot en freindlich aber bestimmt druf hing'wiesa, dass des vrbodda ischd ond a A'zeig noch sich zieht.

No hot dr Rentner gfrogt, wie hoch denn des Strofmaß sei ond hot denne verdutzte Beamte sein Plan g'standa. Er hot nämlich den Abfall bloß vrbrennt, damit'r en 's Gfängnis kommt. Weil do dät's em emmr no besser ganga als bei seiner Frau. Aber weil des Vrbrenna von Abfall bloß a Ordnungswidrigkeit ond koi Stroftat isch, isch'r halt net en 's Gfängnis komma, sondern hot wieder zu seim Weib miassa. Ond dia hot jesasmäßig döbrat, wo se des mit dem Bußgeldbescheid mitkriegt hot.

Er hot se jo sellamols bei ra Miss-Wahl kenna glernt, seinerzeit. Ond als des hot sich's jo no au rausg'stellt, als a Misswahl. Dia oinzig zwoi scheene Stonda, wo der Ma' en seim Läba g'het hot, warat bei dr Hochzeit die zwoi Stonda, wo se d' Braut entführt hend. Er isch jo heit no mit seim Schwogr sauer, dass'r se wieder brocht hot.

Kurz drvor hot des Drama jo scho a'gfanga. Gleit noch dr Kirch hot's



Theater gäa, bloß weil er au mit hot auf's Hochzeitsfoto wella. Des ka mr doch verschtäu!

Mir Männer send oifach a arme, unterdrückte Randgruppe em emanzi-pierte Matriarchat.

Ond d' Alice Schwarzer isch dui Woch' au scho 65 worda. Guad scheenr isch se au net worda. Aber dui Hupfdohl hot ons emanzipationsirritierte Männer dui ganze Supp' ei'brockt, die drzua gefiarht hot, dass emmer meh Männer zu solche Vrzweiflongstata gezwunga send. So wia der arme Rentner en Würzburg. I werd en amol b'suacha, damit mr en Erfahrungsaustausch macha kenat. Vielleicht will i au mol Abfall verbrenna ...

Bis näggschd Woch'

Ihr

Wulf Wager